

Teoria e pratica per possessur e tgaun

La fasa transitorica per acquirar il permiss da tener tgaun ei a fin

DAD ANDREAS CADONAU / ANR

■ Il possessur da tgaun sto frequentar cun siu cumpogn da quater combas in cuors. Quei vala per tals possessurs che han acquistau in tgaun suenter igl emprem da settember 2008. La fasa transitorica per l'introducziun dil cuors da tgauns va a fin igl emprem da settember 2010. La nova lescha per il schurmetg dils animals pretenda dils possessurs da tgauns d'absolver in cuors cun ina part pratica ed ina part teoretica. Per introducir la lescha ei vegniu stipulau ina fasa transitorica per il temps denter igl emprem da settember 2008 ed igl emprem da settember 2010. Buca pertuccadas dallas pretensiuns dalla lescha ein tut quellas persunas che han acquistau il tgaun avon igl emprem da settember 2008. La fasa transitorica dall'introducziun dalla lescha differenziescha denter possessurs da tgauns che han mess neu in niev Fido denter igl emprem da settember 2008 ed igl emprem da settember 2010. Els han peda d'absolver il cuors pratic enteifer in onn. Novs possessurs da tgauns han da frequentar enteifer in onn ton ina part teoretica da quater uras davart la veta da tgaun sco era quater uras lavur pratica cun tgaun ed instrucziun neu dad ina persuna scolada. Suenter igl emprem da settember 2010 vala il principi per mintga niev possessur da tgaun: «Negin tgaun senza in'introducziun teoretica suandada dad ina part pratica.» Enteifer in onn sto era mintgin che ha gia teniu inaga in tgaun frequenter in cuors pratic enaquella ch'el metta neu in niev animal.

Differentas reacziuns

A Mustér porscha *Flurina Tschuor* cuors per tgauns e patrums. La trenadra da tgauns e scolada ella psicologia d'animals ha tschintschau da differentas reacziuns dils possessurs da tgauns sin las



Sulet las persunas che han acquistau il tgaun avon igl emprem da settember 2008 san sefutar dall'incumbensa da frequentar in cuors da tgauns.

FOTO A. CADONAU

pretensiuns d'acquirar aschidagir in permiss per tener tgaun. Ella ha dau d'entellir da haver retschert beinenqual reacziun hanada viers l'obligaziun da cuors. Quei malgrad buc esser responsabla per la lescha. La plipart dils possessurs da tgauns pertuccai dallas premissas legalas ei sfurzada da sefatschentar cun la part pratica dil cuors da tgauns. Flurina Tschuor sa denton era relatar da reacziuns positivass. Era dalla vart da persunas che possedan gia dapi onns in tgaun. Talas han dau d'entellir da haver profitau dallas econuschientschas novas fatgas duront il cuors da

mintgamaì duas ga duas uras. La trenadra da tgauns da Mustér sesprova da curclar ils basegns individuals dils possessurs e lur cumpogns. Ella ha fatg stem dad ina certa munconza da savida neu dils patrums davart il cumportament dallas singulas razzas da tgauns.

Flurina Tschuor sesprova era d'entrar en damondas individualas dils possessurs senza negligir d'intermediar reglas generalas pertuccont cumportament dil tgaun viers ils camonds da patrums e patrums. Ella ha puntuau da puder intermediar duront duas ga duas uras sulet las causas fundamentalas per segirar

ina convivenza vicendeivla denter carstgaun ed animal. Ella ha vinavon puntuau ch'ei detti patrums promts da seprofundar e megliar quella convivenza era suenter haver frequentau il cuors obligatoric.

Dalla confederaziun al cantun e vinavon allas vischnaucas

Da reacziuns sa era igl incumbensau per fatgs da tgauns dil cantun Grischun, *Martin Lienhard*, relatar. Momentan scalina era tier el egl Uffeci da veterinari cantunal il telefon empau pli stedi. Il cantun ha retschert neu dalla confede-

raziun l'incumbensa da controllar l'execuziun dalla lescha. Il cantun ha surdau quell'incumbensa da controllar allas vischnaucas. *Martin Lienhard* ha menziunau che sulet quella soluziun garante-schi in tractament egual da tut ils possessurs da tgauns egl entir cantun Grischun. Momentan porschien trenaders da tgauns lur cuors en tut las regiuns. Las adressas da trenadras e trenaders da tgaun ch'offereschon ils cuors ein publicadas ella reit electronica dil Uffeci federal da veterinari. Il cantun ei lundervi d'elavurar ina semeglionta purschida en l'atgna pagina che vegn momentan sur-luvrada. Ella gliesta federala ein nudadas en Surselva las trenadras *Flurina Tschuor* da Mustér ed *Astrid Bühlmann* da Ruschein. Tiegli Uffeci federal da veterinari quent'ins cun circa 40 000 possessurs da tgauns incaricai d'acquirar in attest dil cuors. *Martin Lienhard* schazegia che biebein ina tiarza dils passa 13 000 possessurs da tgauns grischuns seigi sutamessa allas prescripziuns da frequentar il cuors, ils biars igl arranschament pratic. El ei perschadius che la gronda part dils possessurs grischuns vegni ad ademplir las premissas. Tut quels che sefutan astgan quintar da vegnir puni baul ni tard. Controllar ston las vischnaucas, ed ellas san far quei enaquella ch'il patrun dil tgaun garegia al spurtegl communal la nova marca da tgauns. Aspects positivs per tgauns e possessurs pertuccont la pratica da cuors vesan ton igl incumbensau dil cantun sco la trenadra da tgauns *Flurina Tschuor*. Persunas che vulan acquirar da niev in tgaun vegnan a ponderar quei pass pli da rudien en veta all'incumbensa da frequentar in cuors. Semplamein inaga cumprar il tgaun, aschidagir sco emprova, e stuschar il tgaun en in cantun ni en ina pensiuva d'animals sche la cumpra secumprova buc, quei secumportar astgass curdar empau ord moda.

Fiasta gronda dils reformai da Sagogn

La pleiv evangelica Sagogn/Laax/Falera festivescha 300 onns

■ Dumengia proxima ei fiasta gronda a Sagogn: La pleiv reformada commemorescha il 300avel anniversari dapi la fundaziun dalla pleiv. Igl eveniment ha liug en duas parts e pil giubileum ha la suprastonza ediu ina brochura historica. La suprastonza dalla pleiv evangelica da Sagogn ei dapi varga in onn vidlunder da preparar la fiasta commemorativa. Dumengia proxima eis ei schi lunsch: Cun in survetsch divin festiv, cun produczions ella halla plurivalenta e cun ina inscenaziun da teater ella baselgia reformada commemorescha la pleiv evangelica Sagogn/Laax/Falera igl anniversari da 300 onns. Igl onn 1710 haveva ina pintga raspada da reformai da Sagogn e Falera instituiu la pervenda reformada. Pér 33 onns onns pli tard – pia ina generaziun – ha quella saviu inaugurar l'atgna baselgia.

Cun duas baselgias posseda Sagogn ina particularitad enteifer la region. La historia dils reformai da Sagogn sedistingua lu era da quella dad autras vischnaucas ella Foppa. Suenter la Reformaziun havevan las autras decidu cun ina votaziun da midar la confessiun. A Sagogn ei quei stau auter: Cheu han famiglias che eran s'associadas alla confessiun «nova» viviu sper talas che vulevan restar tier la «veglia». Aschia ei quei stau rodund 100 onns tochen 1633. Ils proxims 100 onns ein stai pli turbulents e signai da conflicts confessiunals.

Sco quei che la presidenta actuala dalla pleiv, *Annalisa Candrian-Bertogg*, conferma, ein quels daditg vargai. «Las rela-

ziuns denter las duas confessiuns ein semidadas positivamein, oz vivan tuts en pasch in cun l'auter», scriva ella ell'introducziun dalla scartira giubilara. Cun duas festivitads – ina da quellas dumengia proxima – vulan ils reformai da Sagogn commemorar ils piuniers che han fundau la pleiv e dallas stentas ch'els han giu avon 300 onns da far quei pass. Suenter il survetsch divin festiv disloche-

scha la raspada en casa da scola. Leu survescha l'uniun da dunnas in gentar comunabel. Ei suondan produczions dils chors-baselgia reuni, dall'uniun da musica, dils affons. El decuors dil suentermiezgi vegn era la brochura festiva presentada. Ei setracta d'ina scartira da rodund 70 paginas che raquenta cun text e maletg dil svilup dalla pleiv reformada. Ils 7 da november 2010 vegn lu seregurdau dalla

fundaziun igl onn 1710 cun ina pintga inscenaziun ed in referat historic da *Martin Bundi*. Cun quella caschun vegnan ils menaders reformai da gliez temps a plaid: Igl quei denter auter il mistral dalla Foppa Jacob de Casutt e giuncher Gallus Castellli a S. Nazaro. Ina gruppa da teatristas e teatrist vegn ad entscheiver proximamein las emprovas pil teater cun quellas duas figuras ed autras. *Augustin Beeli*



Il cudisch dalla fundaziun dalla pleiv evangelica da Sagogn.

MAD

LA QUOTIDIANA

Editura: Südostschweiz Presse und Print AG
 Editeur: Hanspeter Lebrument
 CEO: Andrea Masüger

Schefredactor: Martin Cabalzar

Redacziun

Agentura da Novitads Rumantscha (ANR):
 Flurin Andry (fa), Gieri Antoni Caviezel (gac),
 Claudia Cadruvi (vi), Martina Fontana (mfo), Hans
 Huonder (hh), Susi Rothmund (sr), Gion Nuteg
 Stgier (gns), Giusep Venzin (gv).

Collavorators redacziunals:

Andreas Cadonau (ac), Giusep Capaul (gc),
 Lucas Deplazes (ld), Paul Dosch (pd).

Adressas redacziunals:

La Quotidiana, Via comerciala 22, 7007 Cuira,
 tel. 081 920 07 10, fax 081 920 07 15,
 mail: redaktion-lq@suedostschweiz.ch

Agentura da Novitads Rumantscha (ANR)

Via da Masans 2, 7000 Cuera,
 tel. 081 250 48 00, fax 081 250 48 03,
 mail: anr@spin.ch
 Surselva: tel. 081 936 47 00, fax 081 936 47 01,
 mail: surselva@anr.ch
 Engiadina: tel. 079 218 27 60, fax 081 856 11 59,
 mail: engiadina@anr.ch
 Surmeir: tel. 079 430 69 30, fax 081 684 32 82,
 mail: surmeir@anr.ch

Editura Südostschweiz Presse und Print AG,

Via da la caserna 1, 7007 Cuira,
 tel. 081 255 50 50, fax 081 255 51 10
 mail: cmoser@suedostschweiz.ch

Servetsch d'abunents e da distribuziun:
 tel. 0844 226 226, mail: abo@suedostschweiz.ch

Inserats

Südostschweiz Publicitas AG,
 Via S. Clau Sura 11, 7130 Glion
 tel. 081 920 07 17, fax 081 920 07 18,
 mail: ilanz@so-publicitas.ch

La Quotidiana cumpara tschintg giadas ad emna
 Ediziu: «Die Südostschweiz»: 125 719 exemplars.
 Dumber da lecturs: 234 000

Communicaziun da participaziun considerablas

sin fundament da art. 322 CP:
 Südostschweiz Radio AG, Südostschweiz TV AG,
 Südostschweiz Emotion AG, Südostschweiz
 Pressevertrieb AG, Südostschweiz Partner AG,
 ergo use swiss ag.

Dretgs d'editer

Igl è scumandà a terzas persunas betg
 autorisadas da reutilisar en ina moda u maniera ils inse-
 rats stampads en quest titel u parts da quels, surtut cun
 endatar els en in servetsch d'online. Mintga cuntreven-
 ziu vegn persecutada giudizialmain da la societad da
 propaganda, suenter avair consultà la editura.

Südostschweiz Presse und Print AG